

01 綿仔紙佢阮滾耍笑

賴又嘉

國際紙漿欲起價矣！綿仔紙的廠商放風聲講價數欲綴咧起。這個時陣，樓頂招樓趺、厝邊招隔壁、親情五十綴咧從.....是欲去佢？逐家攏從對大賣場去囉！

紙漿會當做真濟物仔，是按怎獨獨是綿仔紙上敏感？原因是咧「趕緊」的時陣無伊就袂使得所致，電視若開開，逐工攏是咧報某乜賣場人畀人，相爭搶綿仔紙。騎oo-tóo-bái、駛自家用的來搬，當然是無夠看，li-á-khah 和貨車攏出動矣，才是厲害。毋知的人叫是欲相戰矣，消息無夠靈通的人叫是咧搬免錢的。我這個跤手慢鈍的人煞一粒頭兩粒大？我厝裡拄好賸一包，我嘛干焦想欲佢平常時全款揸一揸綿仔紙轉去，無疑悟，熟似的架仔頂哪會空空空，今，是咧按怎？

佇咱這個富裕的臺灣，民生用品講欲愛佻濟就有佻濟，生目睷嘛毋捌看過這欸狀況。鼻仔摸咧，閣來去別間看覓。就按呢，走過一間閣一間，也問過一舖過一舖，「無貨囉」逐間都是全款的回答。我一向誠樂觀，心內猶原想講無要緊，今仔日無，明仔載才閣來。講真的，連繼幾若工攏是加走的，我仙想都想無，是綿仔紙咧創治咱？抑是咧佢咱

滾耍笑？頭一改買物件遮忝、遮無步，真正是有錢煞無地買！

無奈何，愛敲電話討救兵囉。電話通矣，阿姊的大嚨喉空佇電話的彼引傳過來：「都叫你愛趕緊，你看，我講甲準準，這馬恁兜愛學印度人全款用倒手拭.....。」當然，阿姊上尾有允我，欲救濟我一揸綿仔紙。

當當我去阿姊遐，煞予規厝間的綿仔紙驚著，竟然排規排親像咧共我攞手，閣講：「阮是咧佢你滾耍笑的。」綿仔紙啊綿仔紙，咱莫閣耍矣，敢好？

代誌過去幾若個月矣，綿仔紙真正起價矣。彼工我閣去大賣場買日用品，刁故意楚去綿仔紙的架仔看看咧，這馬綿仔紙是窒倒街，欲愛啥物牌子的都有。欲結數的時，閣送我一包綿仔紙。手提這包綿仔紙煞予我起愛笑，底當時「你」哪會予人做伴手咧送？我沿路駛車沿路笑，綿仔紙若親像嘛知影，綴我同齊笑。

02 白糖粿

陳雅菁

「頭家，共我包三塊白糖粿！」若轉來臺南，我定著會從來這個所在排列，待佇人群內底聊聊仔等待這味數念誠久的故鄉好滋味！

一塊一塊白 phau-phau、幼麵麵的「白糖粿」佇油鼎內底汨來汨去，勻勻仔焗起來。細漢的時，老爸煮我來買的記持嘛綴咧浮出來，彼是一種幸福恰滿足。看頭家共「白糖粿」潏一沿塗豆糖粉，就若親像一個幼秀的姑娘仔，穿一領嬌噹噹的新衫全款，予人真意愛。

你敢知影「白糖粿」是按怎來的？我哪會遐爾恰意「白糖粿」？其實伊毋但酥酥軟軟、口味好，猶閣有一個真嬌的故事。伊原底是用來拜七娘媽的，舊曆七月初七是七娘媽生，傳說彼工是牛郎、織女相會的日子，因為個一冬才見一擺面，所以信眾會共大粒的圓仔砑予平，中央閣用大頭拇擱一凹，聽講是欲貯織女的目屎。這種祭品號做「糖粿」，嘛有人講是「碗圓仔」。落尾，有人發見共伊揆予長，園入去油鼎內底糲，食起來特別芳，沓沓仔就演變做現此時的這個形體，嘛成做臺灣南部特殊的喙食物仔。

白糖粿的做法看起來真簡單，提秬米粉直接來做就會使。毋過佇古早時代，愛先共秬米浸一站仔，繼落來挨米、

砑米漿、做粿粿、擲做規丸才閣捻做一塊一塊落去糲，上尾園佇塗豆糖粉內底潏潏咧，按呢芳 kòng-kòng、燒燙燙的白糖粿就完成矣，予人看甲喙瀾湑湑津呢！

佇王浩一先生的「慢食府城」這本冊內底，有記錄著「白糖粿」是漳州恰泉州的傳統點心，我是佇臺南大漢的，嘛誠恰意這種簡單、樸實的厝邊點心。毋過，來到臺北了後，就真罕得聽著「白糖粿」矣！這馬，全臺灣揣無幾擔咧賣白糖粿，逐擺轉去後頭厝，攞會走去買這味！

「來喔！你的三塊白糖粿好矣！」排佇插插插的人群內底，提著我數想足久的白糖粿，等袂赴轉到厝就隨咬一喙！「著！就是這味，這就是故鄉的滋味！」

觀光客排的是面冊懸頂當時行的古早味，我排的是自細漢以來，園佇心肝頭甜蜜的懷念。

03 變魔術

吳政修

細漢的時陣，我上愛去夜市仔看王祿仔仙表演，通常攞是咧拍拳頭賣膏藥：有特技表演、唱歌、脫衣舞佢變魔術。其中我上愛看的就是變魔術。逐禮拜五暗時七點，食飯飽身軀趕緊清彩鑪鑪咧，就兇兇狂狂趕欲去廟口占位，揀一个袂去予大人鬧著的好位。頭前的節目攞是王祿仔咧賣藥仔，講一寡阿沙不魯的代誌，阮因仔人哪會聽有伊大人是咧講啥貨。精彩的魔術表演，佇節目進行到一半彼跛兜才會開始。變魔術實在是一種足趣味的表演，魔術師會當共物件變無去，嘛會當共細張的錢變做大張的。上勢的是共人的跛手骨剝斷，毋但袂流血，閣會當當場接倒轉去。逐家是看甲哀爸叫母，愈驚愈愛看，實在有夠劈！王祿仔仙上愛揣因仔來創治，有一擺我予伊摸起去台仔頂，伊竟然對我的褲底變一隻粉鳥出來，害我驚甲差一點仔滲尿，予現場的阿公和阿媽是笑甲強欲落下頰。

就按呢我細漢的時陣，感覺魔術是萬能的。我捌數想欲用魔術共討厭的人變予無去，予恐怖的考試單消失去，抑是予老師雄雄袂記得欲考試。有一擺阿母叫我食會咬喙的菠蔞仔，我足想欲共遐的無佢意食的青菜，攞總變做我上愛食的海產。想罔想啦，當頭白日千萬毋通陷眠，做人

嘛是愛面對現實，拍拚做工課較實在。

毋過，我閣足想欲變一个魔術，共阿母變轉來阮身邊。阿母的腰子嘛洗二十幾年矣，伊佇大前年就轉去天頂做仙矣。雖然變魔術無法度共阿母的身體變勇健，毋過伊若會當看我表演，一定會足歡喜。心情若快活，身體就會較爽快，只不過這馬講遮的攞是加講的。「在生一粒豆，較贏死了拜豬頭」，有孝爸母咱著愛趁早。

魔術的世界是迷人的，是趣味的，毋是像一寡王祿仔仙干焦會曉騙人。魔術毋是共痛苦變無去，是改變咱人的心佢奮鬥的勇氣。魔術嘛無可能共失去的親人變倒轉來，是叫咱愛了解世間的無常，珍惜身軀邊的每一個人佢這世人的緣份。

04 我的人生，我創造。

陳美虹¹

阮小弟自細漢就袂愛讀冊，定定提厝裡害去的電器用品摸東摸西，拆開來研究。爸母攏講伊讀冊毋讀冊，干焦愛烏白變東變西，後擺是欲靠啥物賺食？

爸母對困兒序細的向望阮嘛知影，毋過自細漢摸東摸西，摸出興趣，厝內大大細細的電器用品，真濟嘛攏予伊修理甲好勢好勢，替厝裡省袂少錢，實在真無簡單。

國中畢業了後，為著欲替厝裡省錢，所以小弟選擇去讀私立學校的建教合作班。別人咧讀冊的時陣伊是佇工廠咧做工課，學生困仔歡喜歇寒、歇熱會當相招出去迺迺的時，伊才轉去學校讀冊。知影家己的爸母無像別人兜遐好額，自伊讀高職了後就誠認真讀冊，逐擺攏考頭名領獎學金。高職畢業就直接去做兵，嘛毋免共厝裡提錢，實在予人感覺真貼心。

退伍了後，小弟感覺伊家己的學識無夠懸，所以就閣考二專。二專畢業了後，有興趣想欲做老師，就參加插班大學的考試，尾仔考著高雄師大。毋過彼个時陣無佹濟老師的缺，伊就直接去考國家太空中心做工程師。靠伊的專業技術佇遐做研究，是無啥困難的。

2017年八月二五，福衛五號送去美國，佇加州范登堡

空軍基地順利發射升空，這毋但是太空科技的成就，嘛是咱臺灣人的驕傲。我共伊恭喜，講伊實在真無簡單，會當參與遮爾盛大的工課，而且閣予中心派去美國做第一線的觀察人員。伊笑笑仔講：「我佹意這項工課，而且這嘛是我的本份，我只是盡家己份內的責任爾爾。一件成功的代誌是愛靠團隊的合作才會圓滿，我只是這個團隊內底一粒小小的螺絲釘啦！」

聽著伊按呢講，心內實在真感動。我嘛佹伊分享講：「恁逐家攏佇家己的工作上認真做到上周至，嘛佹團隊保持上好的連結，才有今仔日的成果。一粒小小的螺絲釘無法度發揮伊的功能，毋過佇團隊內底，若是有任何一粒螺絲釘落去，就袂當完成這個重要的任務矣！」

對阮小弟身軀頂，我看著伊靠家己的意志創造伊美好的人生！

¹陳美虹(hông)

05 快樂毋通清彩

楊玲怡

五月，為著欲做母親節的海報，就教囡仔用色紙來鉸花。這節課的學習目標是欲予囡仔學會曉用色紙對拗了後，用筆共設計的花瓣畫予好，上尾才共無愛的部份鉸掉，展開就是一蕊花囉！

頭起先，我先解說一遍。個看老師一步一步做落去，若親像咧變魔術仝款，逐家目調金金相，喺仔笑甲裂 sai-sai。等到花瓣展開的時，雄雄逐家攞「哇！」一聲，「足孀的！」「老師！阮嘛欲做啦！」看著囡仔遮爾愛學習，做老師的哪有講毋好的道理咧？拍鐵，當然愛趁燒啊！

每一個囡仔看著老師欲分色紙，就開始慄慄掣，手伸甲長長長，喺那喝咻「老師，我無提著，我無啦！」規間教室鬧熱滾滾，袂輸烏仔囡毋知楞佻久矣，喺開開等烏仔毋來飼。分好矣，有人是足急性，較清彩，無十秒鐘就喝「好矣！」毋過，對拗的所在，角愛拄角，紙邊愛疊予整齊，伊攞無注意著，干焦歡喜欲拗紙。嘛有人沓沓仔拗，逐片都對甲足齊的。繼落來愛畫花瓣的形體，這步就是鉸角的所在。因為對拗的紙，若欲成做一蕊花，中央的所在愛相連，絕對袂使鉸掉，若無細膩鉸毋著片，花瓣就一片一片散開去，毋成樣矣。為著欲予囡仔知影這步的重要，

我閣特別共個強調。

畫好了後，有人真頂真，會先展開檢查看覓；有人畫好，看看咧無啥自信，就擲手問老師，啊嘛有一兩個較好膽的，誠勇敢，先鉸才講。這段過程，我感覺足趣味的，就放手予個試看覓。最後一步鉸落去，鉸了又閣是一遍的驚喜，有人是懸聲喝「哇！」有人是低聲喝「哇！」平平哇一聲，一下聽就知影啥人鉸出一蕊花，啥人鉸甲花花花。

佇這遍的活動當中，我發覺囡仔攞誠歡喜，就算鉸了糗去猶原是笑哈哈。對個來講，毋但會使那做那學，閣會使對錯誤當中學習，是上有價值的所在。毋管咧學啥物，保持快樂的心情，骨力學毋通清彩，表現出來的精神、態度佻品質，絕對是一粒一的，實在予人會呵咗得！

06 來去看飛行機生卵

曾文慧

讀幼稚園進前，我佢屏東潮州的外公外媽做伙踫。從有記持開始，便若聽著阿公喝一聲：「乖孫的！咱來去看飛行機生卵！」我就會嚟仔笑 gi-gi，趕緊跔起去外公的跔踏車後座。公孫仔兩個人，那唱歌那趕去彼个規大片攏是青 ling-ling 的草仔埔，遐是全臺灣唯一有阿兵哥咧跳 la-ká-sáng 的所在。

聽阿母講，自我會溜溜走開始，阮外公就足愛恁我去看阿兵哥跳傘。好天時仔，阿兵哥訓練的時間一下到，就有一台飛行機慢慢仔對遠遠的天邊飛倚來。阮看著飛行機愈來愈大隻，期待的心情嘛綴咧沖沖滾。無佻久，飛行機就像雞母咧生卵，一蕊閣一蕊的 la-ká-sáng 滿天邊。等 la-ká-sáng 展開，就親像一隻閣一隻青色的海蛇，佇天頂飄過來閣飄過去，予人愈看愈心適，逐擺我攏看甲目睷展大蕊，歡喜甲吱吱叫。

毋但按呢喔，緊張的閣佇後壁。阿兵哥對飛行機頂跳落來，是毋是會成功，就親像八仙過海，隨人變通。有人技術一流，親像烏鼠仔入牛角，穩觸觸。待佇阮邊仔的阿伯會共個呼噓仔，嘍仔聲催無煞。毋過，有的天兵實在予人袂呵佬得，個袂輸是目睷花花，匏仔看做菜瓜，煞對邊

仔的檳榔園直直飛倚去。用跔頭跌想嘛知，到尾仔煞牢佇樹仔頂，進無步，退無路，叫天叫地嘛無法度。

人講天有不測風雲，連孔子公嘛毋敢收人的隔暝帖，跳傘上驚的就是種芋仔兼犁田，明明相準準欲落佇草仔埔，煞雄雄透一陣風，害 la-ká-sáng 挽袂轉來，這聲彼个歹運的阿兵哥穩當會摔佇邊仔的打馬膠路，疼甲哀爸叫母！連我用看的，嘛會心臟必嘍跳，活欲驚死，目屎綴咧輾落來，趕緊共阿公攏牢牢。阿公那幌頭，那文文仔笑講：「拍斷手骨，顛倒勇啦！人講：跋一倒，祛著一隻金雞母，後擺，個就會愈來愈厲害！毋通驚失敗，跋倒閣跔起來，你會愈大漢、愈勇敢喔！」

潮州跳傘場，會當看飛行機生卵的所在，遐毋但有阿公對我的疼惜，嘛是阿公教我人生道理的所在。佇我的心肝底，已經無任何所在，會當佢伊比並。

07 踔大雪山頂種樹仔

曾裕樞¹

臺灣有一个種樹仔大王，叫做賴倍元。1986年，賴桑若像青盲的毋驚銃，開三千萬買五甲的山坡地，煞去買著一粒糞埽山，車兩千車的糞埽才清出一塊空地仔。就按呢，開始伊種樹仔的人生。這馬伊已經椴甲十粒山相連，山頂攏是懸挂天國寶級的樹仔。這片山林伊無欲賣、無欲剝，嘛無欲留予囡孫，拍算全部攏欲獻予臺灣。

若是你有上億的財產，你會按怎開？大部份的人攏會選擇去投資，錢絞錢想欲趁閣較濟錢，抑是開免驚的盡量去享受。毋過這個有數十億家產的賴桑，伊的想法是：「干焦種樹仔投資未來，才會當補償過去咱人對環境的損害。」賴桑用掉所有的家伙去種樹仔，開創一大片曠闊的山林。伊認為共過去人類損蕩的資源，用種樹仔的方式共還轉去予大自然，才是上有意義的投資。伊這種對大自然的熱情恰阿戇仔的做法，予人共譬相做「天下第一戇人」。

賴桑國中出業了後，就開始扞厝裡的運送店。彼當陣，拄好是臺灣農業轉對工業的年代，貨運產業當興，猶未二五歲的賴桑就已經是家產數十億的大頭家矣。花無百日紅，時間經過，伊看著捌服務過的大公司，十間有九間倒。伊認為文明科技的進步比袂過精神的境界，人生是愛追求做

大代誌，毋是做大企業嘛毋是趁大錢，青翠閣萬年久遠的山林才真正是永遠的財富。

就因為看著山坡地予人翻甲烏魯木齊，定定有塗石流的意外咧發生，伊智覺著臺灣的土地已經袂當閣繼續破壞落去，愛趕緊共樹仔種倒轉去。伊去請教足濟木材行的頭家，共個問講：大雪山頂種啥物樹仔較好咧？得著的答案是：種咱臺灣千年的國寶樹，親像松梧、紅豆杉上好。自按呢，這個少年的賴桑就開始伊種樹仔的人生。

賴桑用伊的手替未來種落希望的種子，現此時，這片山林有濟濟的性命咧生淡。賴桑用家己的雙手創造千變萬化豐富的生態，伊共天公伯仔予伊的福報，轉變做對臺灣這塊土地的大愛！

¹曾裕樞(luì)

08 公車

張淑芳

人講坐公車錢較省，這馬的公車會使講俗閣利便。彼工坐公車，看著鑰卡的機器頂仔，貼一張指指的圖，閣寫『路加』兩字。我坐佇公車頂，心內咧想：『路加』是啥？啥是『路加』？落尾雄雄予我想著，隨笑出來，原來是閩南語的「鑰遮」啦。

人佇公車頂，心思煞飛轉去到我小學三年仔的時，因為搬厝，五年仔的阿姊逐工攏煮我坐公車去學校讀冊。彼時陣的公車無冷氣，椅座嘛無這馬遮爾四序。椅座若是兩人座的，阮就講彼是情人座；椅座若是長株形、相對相的，阮就講彼是相親座。囡仔人上愛跪佇相親座頂仔，看外口的風景。大人總是叫囡仔愛坐予好，才袂摔落來。彼時陣的公車有車掌小姐咧鉸票，細漢的時陣看車掌鉸票，感覺足奢颺的。公車欲幹正引，車掌小姐會歎齋仔 pi——pi——pi——，司機就聽伊的指揮，沓沓仔幹。毋過後來為著節省成本，煞改做一人服務車，司機著愛駛車閣兼鉸票。彼當陣我讀高中，一下上車就隨問司機先生：「我替你鉸票敢好？」司機若應好，我就歡喜甲共鉸票的家私提咧，「kha——kha——kha——」喙笑目笑替人客服務，袂輸囡仔時代扮公伙仔做車掌全款，除了感覺趣味以外，嘛體會著替

人服務的快樂。

恰以早比起來，這馬的公車無論設備、服務攏加真好。等車的時陣，車牌仔有電子字幕，予你知影閣幾分鐘車就會來矣！學生囡仔趕上課，上班的人趕上班，攏免緊張甲一直貓貓看，抑是兩蕊目調金金相——車哪會猶未來？一下上車看你是欲鑰卡抑是橐錢攏會使得，車頂有冷氣通吹、椅座嘛真四序，有的人閣會那坐那眊龜。老大人坐公車免錢，有博愛座通坐，頂仔閣有安全帶保護個的安全。若拄著坐輪椅的人客，司機先生會落車鬥相共，共輪椅揀起去，實在有夠貼心。

時代咧進步，未來的科技會予公車成做啥款，我無法度想像，毋過我相信，每一個年代陪伴咱大漢的公車，攏會成做咱成長共同的記持。

09 潮州燒冷冰的故事

朱志煒

足濟去墾丁迴迴的人，倒轉來經過潮州擺會順繼停落來食一碗燒冷冰。Hǎnn，有燒的冰喔？原來彼是礮冰內底園一粒燒燒的圓仔。熱人食一碗礮冰，tshi 一下透心涼，食咧欲煞閣有一粒餛餛的圓仔，咬落去甜甜燒燒的餡流出來，有夠讚的滋味。

燒冷冰這種物件是按怎來的？故事是按呢，古早古早佇圓環仔附近有一个阿婆仔咧賣圓仔湯。逐下晡，伊對厝裡共擔仔揀來到圓環仔。因為圓仔湯是燒的，寒人的時人客較愛食燒的，生理蓋好，免偌久就賣了了。毋過若是到熱人，有時仔到天暗矣嘛猶閣咧賣。

七月的一个下晡，日頭若火爐，打馬膠路予烘一下軟膏膏袂輸會戛按呢，街仔路無啥物人。阿婆一手提瓜笠仔咧撲風，用另外一引的手腕拭汗。嘛毋知過偌久的時間，日頭走無去矣，烏天暗地，風透甲像咧做風颱，phé 一下大雨到位，佇路裡的人袂赴通走，予沃甲澹 lì-lok。

毋過這個雨聲恰普通時仔無仝，親像掖豆仔仝款，tiak、tiak、tiak.....，落佇桶仔底閣有咚、咚、咚的聲，這敢若毋是雨，啊！是落雹！阿婆仔連擔仔嘛袂赴通收，緊走去亭仔跤覘。

無偌久，日頭閣出來矣，烏雲嘛散了了。這個時陣，阿婆仔發見講，伊的圓仔湯頂面有一重厚厚白白，袂輸若礮冰的冰雹。拄才焗好的圓仔，焗著冰，一粒仔一粒圓 kùn-kùn，照著日頭閣逐粒金爍爍。

阿婆仔想講今這無法度閣賣矣，毋過若共倒揸揸閣拍損，抖一粒仔來食看覓。喔！圓仔皮夭壽餛，咬落去到地，甜甜燒燒的餡流出來，猶閣咧衝煙，有夠著味。賸的圓仔揸轉去請厝邊頭尾食，食著的人逐家都呵咾甲。

阿婆仔心肝頭察一下，想著一步：熱人無人愛食燒燙燙的圓仔，若是像今仔日按呢，共濫佇礮冰內底，一定蓋濟人會愛食。隔轉工阿婆仔的擔仔就加載一桶礮冰恰一寡料，人客叫是阿婆改賣礮冰，等食著燒圓仔，M！目睷攏金起來，一直頓頭呵咾好食。自按呢，逐个相爭欲來圓環仔食阿婆仔濫燒圓仔的礮冰，燒冷冰的名聲就愈淡愈遠。

10 愛嬌的代價

黃琬芸¹

有一寡人生做尪仔面，看著比同年的人較幼齒，猶毋過，嘛有人老起來等，自細漢就比別人較臭老，這攞是隨人的基因。不而過，這馬醫學美容遮爾發達，真濟人大只的銀票捧咧去揣醫生，有的欲做目睭重巡；有的欲共鼻仔龍骨疊較懸咧；有的欲共國字面削做瓜子面……。當然，逐項攞著愛開錢，閣毋是小可仔錢爾爾，莫怪醫美診所滿滿是，病院的醫生走去美容整形中心，共人點斑、搨皮、抽油、做假奶……。

早前猶未有雷射的技術，一寡查某人去開刀搨皮，無細膩割著微神經，煞連欲笑欲哭都無法度自由。新聞定定放送，某七人去抽油煞感染著蜂岫癰；某七人割重巡割一下目睭大細蕊；某七人面肉內底埋線煞變成貓仔面，毋敢出門閣愛開錢拍官司，真正是無枷夯傀儡。

為著好奇，我捌去共烏斑、烏痣點掉，嘛捌買診所推銷的產品。遐的醫美業者攞足有嚟水，緊紹介診所內底貴參參的療程：搨皮一擺幾萬箍，後擺兩三年著愛閣來一擺，若無就會走山。聽聽咧，我共伊講：「我轉去考慮看覓咧！」就阿婆仔閩港矣。彼五千箍當做開眼界的學費，若欲閣開五萬、五十萬，有影開袂落去。

天公伯仔到底是共變老的機關安佇人身上的啥物所在？

是按怎我若看著「美魔女」，毋管伊的面抹甲佻白、頭毛染甲佻烏、腰束奶嘍尻川閣有砢砢，毋過伊的目神是無法度瞞人的啦。

廣告的魔力誠厲害，我嘛捌看著醫美診所的廣告，綴人去注『肉毒桿菌』的射，想欲共額頭的皺紋熨予平。結果，足足半年變殭屍面，連目眉嘛無法度振動。等到目眉會當振動的時陣，皺紋又閣走出來矣。真正是落雨天沃花——無彩工。

生做歹看毋是好空的代誌，毋過愛嬌敢著愛開大錢？做人善良樂暢好笑神、食食天然閣清氣、環境衛生空氣好、家己加減學一寡掠龍順血路的功夫，人若健康就會嬌。若是開大錢討皮疼，閣舞甲拍官司起相告，按呢就算袂和囉。

¹黃琬芸(ûn)